



PM Modi-i anogo ananü
Argentina semdanger

Tuli nung Indoor Badminton
stadium tasen ka semzükogo

Nagaland nung Cooperative Movement tenzüksüla: Zhimomi

Kohima, Chiteni/July 05 (TYO): Minister, Cooperation and PHED, Jacob Zhimomi-i state nung cooperative movement tasü ita tajungba kuma melenshitsü ayongzük aser nüburtem dang dangar dak metaloka aliba yimya indoktsü, tajangzük aliba mapa inyaka aser 2047 tashinung India developed nations akumtsü mangdang aliba nung shilem tajung agitsü ayongzüka liasü.

Kohima nung Department of Cooperation ajanga Honibarnü International Cooperation Day nüngtem nung sentong ka ayongzükba nung jembidang, cooperative sector ya talisa Nagaland rongsenketzüng indang tongtipang tongshi ka asütsüla, kong cooperative society 8,000 dak tema lir, ta Minister Zhimomi-i ashi.

Cooperative society tem nung digitization, ochishia inyakba, aser mapa nung ajemdaker teyari agütsüba nüngdaker, aser mapa meinyakba society tem anentsütsü, ta pai ashi.

"Asenoki aika menügdak, asenoki tajung dang nüngdaker," ta Zhimomi-i ashi aser mangdang makaba, business inyakyim majungba aser sorkar nungi tali-tapong imlaba ajanga cooperative society aikati tamakok ajurua lir ta shisem.

Ato Kilonser Narendra Modi indang mangdang nung ajemaker, 2021 küm Ministry of Cooperation ya yimten yimsüsüba tsütsü alizüng ka

asoshi tenzükba masü saka grassroots economy ajungkettsü asoshi lir, ta Minister Zhimomi-i ashi.

Tang India nung cooperative society 6.5 lakh dak tema lir aser yangji züngsem crore 30 jungnüa lir, aser Nagaland nunga yimya tajung nung shisa tasen apiteta inyaktsü nüngdaker, ta pai ashi.

Meranga inyaktsü aser asangsang entrepreneurship alitsü asoshi pai ayongzük aser Naga nunger lanurtem dangar dak metaloka aliba yimsü aser kera tajangzük angutsü tangatetba tali akumba aitsü.

"Asen lanurtemi manger-mesangwa tsüngta millionaires kumner aser parnoki takok mangdang sorkar tenüng asener. Tamakok ajuruaka tanen makai meranga inyakba aser ajemalu melira, business mesüra movement kecha takum süa melitetsü," ta pai ashi.

"Linük mangdang Viksit Bharat@2047 nung Nagaland dangar memenep malitsüla," ta Zhimomi-i ashi aser ajaki khuret abentsü, local empowerment aser temulung agüja shilem agia cooperative nem anidaktsüba rongsenketzüng yangertsü ayongzüka liasü.

"Development ya bendang len nungi bener marutetsü. Ibai asen kidang, asen yimtsüng, asen yimya nungi tenzüksüla. Asenoki sorkar dak noklang shilem meimlatsüla," ta Minister Jacob Zhimomi-isa ayongzüka liasü.

Nagaland nungi sorkar ketdangsürtem Japan nung oa lir

Kohima, Chiteni/July 05 (TYO): Sorkar tentet, private corporations aser civil society organisations densema stakeholders tem den lungjemer terenlok maparen balala inyaktsü asoshi lenmang bushia Nagaland nungi ketdangsürtemi tang Japan semdanga jajaba mapang lir.

Nagaland Chief Minister, Dr. Neiphiu Rio-i anir iba delegation nungya Chairman Investment and Development Authority of Nagaland (IDAN), Abu Metha; Advisor Industries & Commerce, Hekani Jakhalu; Commission & Secretary, Industries & Commerce, Kumar Ramnikant aser ano danga ketdangsürtem lir.

Chief Minister oa matongdang Investment and Development Authority of Nagaland (IDAN) aser

Department of Industries & Commerce ajanga Tokyo nung July 4, 2025 nü senden balala mena liasü. Item senden ya Abu Metha aser Hekani Jakhalu nati anir mena liasü.

Nagaland aser Japan tsüngta puti otsü aser sobaliba nung tesendaktep tali tashi itshia - talisa World War II heritage aser tang teinyakdak 'people-to-people engagements' ajanga - delegation yagi Nippon Yusen Kabushiki Kaisha (NYK Line), Sasakawa Peace Foundation (SPF), Konnekt Asia, aser Japan International Cooperation Agency (JICA) ama tongtipang lokti tentet tem den sensaksem tajung kaa liasü.

Iba mapang aluyimba aser sendaktepa aliba services, hospitality, healthcare, tourism, arts and culture, sports aser film amala sector

Dimapur aser Niuland nung tzümetsüng aser alinen agi kongshi



Dimapur, Chiteni/July 05 (TYO): Anogo ishika tzünglu kanga sashia aruba ajanga Dimapur aser Niuland nung telemok tesemtem nung Honibarnep tzü metsünga nisung aika pei kidang nungi ainshitsüsa akum.

Telemok len tzü metsüngba ajanga Dimapur nunga Nagarjan lenmang nung khen atema gari sadema mesenzüteti liasü. Kasa mapang United colony (Nagarjan), Sachu colony, Zeliangrong colony, Burma camp areas, Aoyimti aser Purana bazaar nunga tzü metsünga liasü. Item tesemtem nung anogo tepiyong tzü merozepi liasü.

Tzümetsüng mapang kiset shiruru samaba osangtema angazükogo.

Kasa mapang Deputy Commissioner aser Chairman, District Disaster Management Authority, Dimapur, Dr.

Tinojongshi Chang-i nüburtem dang anogo ishika tzünglu aruba ajanga ajungben tzümetsüng adoktsü akok, anungji ayong leni maotsü tekumdangtsü shia liasü.

Ayongkum anasa aliba yimtsüngtem dang tzüngluruwa metembang tashi ayong anasa maparen kecha meinyakdaktsütsü ayongzükogo.

Ajungben koda masü timtem ajuruba mapang State Emergency Operation Centre - 1070 (Toll free number) 0370-2291120/22, State Disaster Response Force (SDRF): 9366819486, 7005806182 aser DDMA, Dimapur- 8415085131 nung tongteprateptsü metetdaktsüogo.

Niuland district nunga tesem tuluka tzü agi mubanga nisung aliba ki aika metsüngbang aser alu, ango tzübo, plantations, farms aser lenmangtem raksaa liasü.

Niuland district kübok yimtsüng 70 dak tema nung iba timtem ajurua aluyimer meyirijang aika pei ki yutsür tesem balala nung jenoka lir.

Lenmang aika nung tzümetsüng agi kongshi aser item rongnung S. Hetoyi Village aser Ghokuto Village sendaktepba lenmang nung alinen tulu alia nüburtem iba lenmang nung mesenzüteti lir.

Kasa mapang lenmang shilem ka tzü agi metsüngzüka aoba ajanga Ghokuto Village ya lenmang tesendaktep makai nüburtem timtema lir.

District Administration ajanga tensa asadangtar aser nüburtem nem teyari agüja nüngdakba mera agitar. Timtem nung alirtem kumzükba aser lenmang yanglushiba maparen tenzükogo, saka tzünglu maneni aruba ajanga inyakyim nung timtem ajurur.

nung human resources development tsütsü lungjemer lenmang bushitsü indang jembia liasü.

Iba mapang Sasakawa Peace Foundation ajanga tang India indang North Eastern states nung people-to-people contact, Track Two diplomacu, yimjung yangerba aser shisatsü lemsatepba nung rangloker project balala teinyakdak aliba indang lemsatep.

Metha-i rara mapang Japan aser Nagaland tsüngta otsü balala atalokba indang lemsatep aser rara mapang temulung khuremtepa aliba ya yimjung aser tesendaktep asoshi tajunglen nungi lungjemer inyaktsü indang jembia liasü.

JICA ajanga Japan nunger industry balala nung India nunger sempet alirtem anioktsü sendaktepa human resource

exchange programmes ulushitsü jangra aliba indang lemsatep. IDAN Chairman-i JICA dang Nagaland nung tang mapa teinyakdak aliba atema pelaba lemsatep aser tarutsü nung külemi teka amteper inyaktsü indanga jembia liasü.

NYK Line den company ajanga Nagaland nung mapa tajung inyakba aser tarutsü nung ano tali inyaktsüba, talisa lanurtem nem employment aser capacity-building opportunities atema hospitality sector nung inyakyim ulushitsüba indang jembia liasü.

Parnoki Kochi Prefecture semdanga, human resource development, skill enhancement, capacity building aser food processing, agriculture aser allied industries nung technology

lemsateptsüba indang jembia liasü. Parnoki Government of Nagaland aser Government of Kochi (Japanese Prefecture ka) tsüngta Memorandum of Understanding (MoU) ka züluteptsü lenmang bushitepa liasü.

Nagaland indang literacy rate ajungba, English oshi nung ajungba aser loktiliba aser sobaliba nung tashi ita aliba indang parnok den lemsatepa liasü. State sorkari maneni Industrial Policy tasen ka parnok den lemsatep, koba ajanga investment aser business tajung inyaktsü atema lenmang sadema lapoktsür.

Item senden ya Chief Minister-i Japan semdanga mapang ketdangsürtem den senden amenba mapang telemtetba balala agitsü asoshi tamendak dak amai lir.

OKM-i takok angurtem tushiba sentong agi



Mokokchung, Chiteni/July 5(TYO): Tanü Mokokchung Town Hall nung Ongpangkong Kaketshir Mungdang (OKM)-i ayongzüka Dr.S.C.Jamir Meritorious Award agütsüba sentong kanga dang takok ngua agiogo.

Ongpangkong Kaketshir Mungdang-i ayongzüka Dr.S.C.Jamir Meritorious Award agütsüba taküm mezüngbuba agüja tenzüker aser tanü iba senpet ya HSLC 2024 küm Top 2 jenjang nung takok angur Sb.Moasanen Pongen aser ano HSLC 2025 küm Top 9 nung takok nguteter Kr.Moamenla B.Kichu tenaprongla nem kuli kakat den sen senpet Rs.20000/- agüja tetushi agütsü.

Tanü sentong nung Dr.SC Jamir-i jembidang Sb.Moasanen Pongen aser Kr.Moamenla B.Kichu tenati Naga nunger kaketshir aika madak takok tulu ngutetba ajanga tanü iba sentong ya akar,anungji tena nema tenüngsang agütsür, iba dak ajemdaker tanüngba Ongpangkong kaketshirtemi ano iba ama khonang ngutettsü merangangma ta adenshia aliba kaketshirtemi ajungshia ashi.

Tanu lanur tazünger tashirtemi onok asoshi tarutsü putu ya kechi jenjang ka nung lirta shishia bilemtsülata paisa

shisem.

Naga nungeri Simon Commission aser Plebiscite indangbo jembir saka asüng Naga nungeri kechi tia ajurutsü iba indangjibo mejembiba ngua kanga dang sasaseta bilemer. Ano Aor-ia Jungliyimti aser Longtrok indang jembir,ibaji meteta alitsü tim, saka talila mejembitsüla, iba ya tali jembiba ajanga meputep,mangatetep aser mashi malu tali shisanger ta Dr.SC.Jamir-isa ashi.

Dr.S.C.Jamir-isa Naga lima indang süoka jembidang Nagaland ya ajaki nukshiba linük ka liasü,India government-i meraketa, akhümкета reprangba linük ka liasü,tenem nisung ajaki Naga nunger nukla repranga liasü kechiaser British nungeri Naga nungerji ochishir,tasütait aser meranga inyakba kin ta zülua yutsü.

Naga kinji tenem kin ajak rongnung pei yimden yimli metetba kin ta alimai meteta liasü. Saka tanü reprangdangra iba akhümketto samaogo, kechiaser Naga nunger tsünga telemsa aika adoka lir ta ashi.

Naga lima nung timtem tulutibaji ochi ayawara lir,Naga lima nükpoker lima ka kümogo,kechiaser Naga nungeri tajung dang tajung, tamajung dang tamajung ta ochishia meshiteter, lepteptsüngtep alidang aser

shiruru ama alidang asenok Aor den Tsüngrem dena liasü, tanü kasa Tsüngrem temoatsü agia Aori Naga nunger yimden temerük ka,longjema aliba kin ka,tejakleni aoba kin ka, azükaruba kin ka asütsü asoshi inyakdita Dr.S.C.Jamir-isa ayongzüka jembir.

Aliba Kaketshir Telongjem lenisüba nung Ongpangkong Kaketshir Mungdang(OKM) Naklu ken tena sentong tenzüka den sentong nung Tsüngrem lenisüba jazüka Rev.Dr.Bendang Lkr Artang Baptist Arogo Pastor ajanga sarasadema tenzüker. Tarur pela agizüka Sb.Tongpangmangyang Kichu Tir OKM-i jembir,Ongpangkong Mungdang Tir Wb.Alemtoshi Imsong ajanga tayongzüka o jembir aser Chuchuyimpang Kaketshir Telongjem ajanga ken tajung ka tena sentong tobur jungdaksü, takok khonang senpet agizüker Sb.Moasanen Pongen aser Kr.Moamenla B.Kichu tenaprongla tepela o jembir aser Wb.Senti Walling Dr.S.C.Jamir Meritorious Award Trust Committee,Convenor ajanga melepzüng o jembir aser Rev.Puryapang Pastor Yimyu Baptist Arogo-i sarasadema sentong tembangba den iba sentong Kr.Tiakala ketdangsüba nung agia liasü.

Forest Guard atema Physical Test indang metetdaksü

Dimapur, Chiteni/July 5 (TYO): Mokokchung district atema Forest Guard Recruitment 2025 asoshi shimer aliba candidate tem Physical Endurance Test atakzüker aliba ama July 7 aser 9 nü Senayangba Government Higher Secondary School (GHSS) Playground, Ungma nungi 5:00 ako nung tenzüksü ta metetdaksüogo.

Endurance Test koba talangka jajaba tetendangba ka lir, iba ya Senayangba GHSS, Ungma kikümtong nungi tenzüker aser QR code scan asü nung adokba lenmang nung jajayonga aotsü.

Tebur candidate tem kilometer 24 (12 km to & fro) ghonda 4 tsüngda jajatsü aser kasa mapang nung tetsürtem ghonda 4 tsüngda kilometer 15 jajatsü.

Candidate tem ajak verification aser tetuyuba balala agütsütsü atema 4:30 ako nungbo tonga arutsü metetdaksüogo. Candidate tem dang talang ka jajatsü ali nung tapet süoshi aser tsüngsem asemstsü, ID proof shitak abentsü, tzü bottle aser nüngdaksüra pei achiba mozü bener arutsü tetuyuba agütsüogo.

Physical test ajangetetba candidate tem indang tenüng

Divisional Forest Office indang notice board aser Department Official website nung adoktsütsü.

Written tatidang ya Mangyangnokcha Government Higher Secondary School nung July 12 nü 10 ako nungi 1 ako tashi agütsü. Tatidang atema kishi 9 ako nung lapoktsü aser 9:45 nung shibangtsü, ta k e t d a n g s ü r t e m i metetdaksüogo.

Kasa mapang nung forest guard mapa atema Department of Forest, Mokokchung Division-i achayaanga recruitment agütsü aliba dak sendakba nung physical Endurance Test ka July 7 aser 9 nü anepdang 5 ako nungi 9 ako tashi Senayangba GHSS play Ground Ungma nungi 2nd gate Alichen (Longkhum-Alichen Junction) tashi agütsü lir.

Iba dak sendakba nung iba lenmang nung senzusenpongertem dang recruitment inyakyim nung kecha tetsükdaksü madokdaksütsü aser recruitment nung shilem agirtem aser ketdangsürtem teküzmükba kübok totsütsü atema gari takokba tashi kanga kümdanga anishitsü Addl. Superintendent of police aser PRO, Mokokchung-i sangdong ka ajanga metetdaksüogo.

ADC Longleng-i tekümdangtsü metetdaksü

Dimapur, Chiteni/July 5 (TYO): Additional Deputy Commissioner, Longleng, Alongdhimen Jamir, NCS-i sangdong ka ajanga, Longleng Town Council (LTC) Municipal Dumping Site nung ak densema tanga shiruru tasümgangtem intokba indang osang angazükogo, ta metetdaksü. Iba ya nüburtem health atema lendong aser iba ajanga mopung menentsür.

Jana shitak mintokba aser talisa shiruru tasümgangtem mashi mashi intokba ajanga health aser tsümgopung lendongbang nung toktsür. Iba amala inyakyim ajanga temeket nung aliba tesemtem menentsütsü, tashidak prokshia yoktsü aser tanga health dak sendakba nung timtemtem adokdaksütsü.

Central Pollution Control Board (CPCB) tetuyuba dak ajemdaker shiruru tasümgang ya scientifically agizüker aliba inyakyimtem amshia intoktsüla, kong shiruru tasümgang rongtokba, aremba densema lir. Iba ya tsümgopung menenba aser nüburtem anema toktsütsü

atema lir, ta ADC-i ashi.

Environment Protection Act kübok tzümgopung menenba nokdangtsü atema legal framework ka agüja lir aser kasa mapang nung Ministry of Environment, Forest and Climate Change (MoEFCC)-i agütsüba Solid Waste Management temzüng ozüng kübok shiruru tasümgang densema janatem kanga junga intoktsü atema tetuyuba agüja lir.

Item temzüng ozüngtem ajanga iba amala jana ya "hazardous waste" mesüra "bio-medical waste," ta züngshir, aser kanga junga bendanga anepalur intoktsü nüngdaker.

Anungji item temzüng ozüng aser tetuyuba ajak dak ajemdaker ADC-i, Longleng Town Council's Municipal Dumping Site mesüra municipal kübok tesem mashika nung shiruru tasümgang mintoktsü tenokdangba agütsüogo.

Iba tetuyuba sülen manidakertem nem temzüng ozüng dak ajemdaker tapet temerenshi agütsütsü, ta ADC-isa metetdaksüogo.

Kohima DPDB July 9 nü amentsü

Dimapur, Chiteni/July 5 (TYO): Kohima Deputy Commissioner, B Henok Buchem-i sangdong ka ajanga, ita shia amenba Kohima District Planning & Development Board (DPDB) senden July it atema July 9 nü11 ako nungi tenzüka DPDB Conference Hall, Kohima nung amentsü ta metetdaksüogo.

Board züngsem ajak dang tamakok maludaksüi senden nung arua shilem agütsü DC-isa metetdaksüogo.

MSUM-i ayonga Financial Literacy Day camp aka



Mkg. Chiteni/ July 5: Mongsenyimti Students Union Mokokchung Unit (MSUM)-i achayaanga Chiteni 5, 2025 anogo SBI LEAD Bank office Mkg. aser CRISIL Foundation den longjemer ayongba Anogo Ka Financial Literacy Camp sentong Mongsenyimti Senso Watem, Sungkomen ward nung kangadang takok ngua agiogo.

Iba sentong nung shisalen sayurtemji T.P Mainingthailiu (Assistant Manager RBO, Mkg.); Izaigong (Deputy Manager, SBI Main Branch); K Hanghal (Chief Manager, SBI Bazar Branch);aser Hazarika (FLC Councillor, Mokokchung & Longleng) nung liasü. Shisaluymier ajak agi 100-tema iba sentong nung tangazükba shisa jenti ngua liasü.

Sentong nung shisalen

sayurtemi Digital Banking, Saving & Investment, Frauds & Cyber Crime aser Social Security Scheme onüktem nung ajemdaker tetuyuba shisa jenti shisaluymiertem den lemsatepa liasü.

K Hanghal, Chief manager, SBI Bazar branch-i sentong nung jembidang ashiba agi, tanü putu maparen ajak digital kümadokogo aser yamala tensa ka nung Cyber ajanga

ashilongka mapa inyakertem tsüngdang nungi jenbua alitsüji kangasa tekümdangtsü mapa ka lir. Temzüngi melaba Game asü masüar memeteti tanü lanurtem aikati sen aahtsü mechi online game mashi mashi bulua sayatepdang rongsen jenti amajok nung laluba dang masü saka tarutsü nunga timtem ajurutsüsa asen miim osangtem

tim masüba lenmang nung prokshia amshidaksür aser item dak sentakba keno jenti anogoshi mezüngdangteti arur ta tekümdangtsü shia liasü. Anungji memetetba nisungtem den pei juri osang mesüra kulitem melemsateptsü paisa shisem.

Temjenzungla, Centre Manager Tuli Block CRISIL Foundation aser AGS MSUM-i ketdangsüa ayongba sentong nung temoatsü meshia Opangsunep, Vice president MSUM-i sarasadem aser Tzuwasanen, President MSUM-i pelaa agizükba O jembia liasü. Sentong nunga kaketshir aika Accidental Insurance scheme PMSBY aser PMJDY (Zero balance saving account) nung tenüng zülüoka yanglu.

Uddhav aser Thackeray na longjemogo



July 05, 2025 nü Mumbai nung 'Awaj Marathicha' rally nung Maharashtra Navnirman Sena (MNS) Tir, Raj Thackeray (abelen) aser Shiv Sena (UBT) Tir, Uddhav Thackeray nati lokti dak teka ayiploktsuba noksa nung angur.

Mumbai, Chiteni/July 05 (Agencies):

Maharashtra nung adianu ana jabsotem-Uddhav Thackeray aser Raj Thackeray na küm 20 sülen tanaben longjemogo; tenati Marathi nunger maitsü atema longjemer raratsü bangjemogo.

Marathi nunger maitsü kümzüksü atema tenati pei tangatetba balala toktsür longjemer. Küm 20 tsüngda tang mezüng Honibarnü Thackeray adianu ana külem sabang ka nung nokdaker jembio.

Tenatisa Centre nung BJP-i aniba sorkari Hindi oshi kangshia benoktsü merangba aitsü.

Shiv Sena party tentetsang, Bal Thackeray indang senmang amangba dak sendakba nung mangatetep adoka 2005 küm Raj Thackeray-i Shiv Sena party tokja liasü aser 2006 küm pai Maharashtra Navnirman Sena party tentet. Iba mapang nungjagi election balala nung party ana tsüngda toktepa aruogo.

Taruba Mumbai civic body election aser Maharashtra nung election ajak nung party anati longjemer tokteptsüa akok.

BJP-i aniba state sorkari Hindi oshi benokba agienba atema Mumbai kübok Worli nung takok anguba rally nung jembidang Uddhav-i, "Onok külemi dang alitsü atema onok longjemogo. Mumbai civic body

aser Maharashtra election nung onoki takok angutsü," ta ashi.

"Asen tashiji asen telongjem nungi adokdaksütsüla. Timtem aliba mapang nung onok longjemer, iba sülenjibo onok tsüngda ano maneni rarateper," ta Uddhav-i ashi.

Taoba assembly election mapang nung ruling BJP indang "batenge toh katenge" yimyim aija Uddhav-i, iba yimyim ya Hindu nunger aser Muslim nunger tsüngda telemsa adokdaksütsü atema liasü, ta ashi.

Kasa sabang nungi jembidang Raj-i, Shiv Sena tentetsang Balasaheb Thackeray aser tangartemi meinyaktetba Chief Minister Devendra Fadnavis-ibo inyaktetogo, kechiyong pai adianu ana longjemdaksüogo, ta ashi.

Raj-isa, oshi dak sendakba nung mangatetep adokdaksüba sülen sorkari maneni kin nung ajemdaker nüburtem tsüngda telemsa adokdaksütsü atema inyaksü, ta ashi.

Shiv Sena tentetsang, Bal Thackeray melenzüktepur anaji-Bal'er jabaso Uddhav Thackeray aser Bal'er adianu chir Raj Thackeray na liasü. Bal Thackeray temang tamajungba akümba mapang nung 2003 küm pai Uddhav Thackeray Shiv Sena working president shima liasü, aser iba mapang nungjagi

adianu chir ana- Uddhav aser Raj na tsüngda mangatetep adok tenzüka liasü.

Raj-i pa sendok ama bilema pai Bal Thackeray aser Uddhav na den pa tebilemba lemsatep aser 2005 küm pai Shiv Sena party tokja liasü.

Ita ishika lir 2006 küm Raj Thackeray-i Maharashtra Navnirman Sena tenteta liasü.

Bal Thackeray süadokba sülen Shiv Sena nung tongti lenirji maneni Uddhav Thackeray liasü. 2022 küm Eknath Shinde-i party toktsü aser BJP den senteper kasa nüngja (Shiv Sena) nung telok ka tenteta liasü.

2024 küm Maharashtra Assembly election nung Shiv Sena (UBT)-i tamakok mejungi ngua liasü.

State sorkari oshi asem policy benokba aser Hindi ya third language asütsü benokba anema adianu chir ana longjemtsüsa aküm.

Ajioda July 5 nü Uddhav aser Raj nati sabang ka nung longjemer Marathi nunger maitsü wazüka ayutsü aser Bal Thackeray tangatetbatem tejakleni bener aotsü sangdonger.

Okila jembidang MNS Tir, Raj-i, state sorkari oshi asem formula benokba ya Maharashtra nungi Mumbai piladaksütsü atema lir, ta ashi.

Uddhav-isa, "Nüburtem matsüngdang kangshia Hindi oshi benoktsü atema onoki sorkar nem temelaba magütsütsü. Shingaia Marathi aser Maharashtra dak tenük meyoktsüla," ta ashi.

Raj aser Uddhav nungeri par jabsotem- Amit aser Aaditya nunger Khristantemi lapokba English school tem nung züngdaksür, ta aitsüba dak sendakba nung Raj Thackeray-i, "Balasaheb Thackeray-a English school nung azüng aser English osangkaket atema inyaka liasü, ajisüaka pai Marathi maitsü atemabo kodanga atsü-anem maka," ta metetdaksü.

PM Modi-i anogo ananü Argentina semdanger



Ato kilonser, Narendra Modi Argentina yimtiba, Buenos Aires nung aliba Ezeiza International Airport atongba sülen India nungertemi pa ajuruba noksa nung angur.

New Delhi, July 05 (Agencies):

Hokolbar aonung Ato kilonser, Narendra Modi Argentina tonga ogo; pai Argentina nung lenirtem den senden mena sector balala nung linük ana tsüngda tesendaktep tashi itshitsü atema jembitsü.

Hokolbar aonung Ato kilonser Modi Ezeiza International Airport atongba mapang lenirtemi pa agizüka liasü. Tesüiba küm 57 tsüngda tang mezüng India Ato kilonser kati official süa Argentina semdanger.

2018 küm nunga G20 Summit nung adentsü atema pa Argentina-i oa liasü.

Modi-i X ajanga, "Buenos Aires tonga ogo. Argentina den tesendaktep tajungba akümstsü atema inyaksü. Ni Tir, Javier Milei ajurua pa den senden amentsü yongyar," ta metetdakja liasü.

Anogo ishika tejaklen linük pongu semdangtsü atema Modi India nungi apusoa liasü aser tang pai linük tasembuba semdanger. Iba jakdang pai Trinidad & Tobago semdang.

Ministry of external affairs-i sangdong ka ajanga, Ato kilonseri Argentina semdangba ajanga India aser Argentina na tsüngda asalentong tsütsü tesendaktep tajungba akümstsü imlar, ta metetdaksü.

Tamalen Modi-i, "Latin

America nung Argentina ya tongtibang partner ka lir aser G20 nunga amalitepa inyakba linük ka lir," ta metetdakja liasü.

Alima nung shale gas reserves teimba aliba linük tanabubaji Argentina lir aser shale oil reserves teimba aliba linüktem rongnung Argentina ya jenjang pezübuba nung lir. Anungji Argentina ya India atema mapang talangka energy partner asütsü.

Argentina nungsa lithium, copper aser alima nung kanga bulua manguba sentioset aika lir, aser itemji India nunger clean energy aser industrial aintsü atema kanga tongtibang.

Bolivia, Chile aser Argentina linüktem dang 'Lithium Triangle' ta ajar. Lithium ya tongtibangsa rechargeable batteries nung amshir aser item battery ji electric gari, mobile phones aser laptops nung amshir.

Ato kilonser Modi-i Argentina Tir Javier Milei den defence, aluyimba, mining, totzü aser gas, renewable energy, shishilembaba aser investment tsütsü taliba amalitepa inyaksü atema jembitsü. Iba dak alia energy aser technology atema-a jembitsü.

Argentina semdangba sülen pa Brazil-i aotsü aser yangji 17buba BRICS senden nung adenba sülen tesüsa Namibia semdangtsü.

Ration atema 'FaceAuth' amshiba mezüngbuba state ji Himachal kümogo

Shimla, July 05 (Agencies):

India nung Public Distribution System (PDS) kübok ration atema Aadhaar-based face authentication (FaceAuth) mezüng amshiba state ji Himachal Pradesh state kümogo, ta Honibarnü ketdangsertemi metetdaksü.

Tang tashi nung authentication atema OTP-based mesüra biometric dang amshia aruogo, ajisüaka SMS delivery aser UIDAI biometric tsütsü timtem kanga ajangshiba agi iba inyakyim melentsüsa aküm, ta Principal Advisor to Chief Minister, Gokul Butail-i metetdaksü.

Tang facility tasenba (FaceAuth) atema fair price shop (FPS) kibur meyong smartphone nung app ka install süa mobile camera

amshir.

"Technology tejakleni aoba den liromedema Digital Technologies and Governance (DDTG), Himachal Pradesh-i Public Distribution System (PDS) kübok temsüa aliba beneficiaries nem ration agütsütsü asoshi Aadhaar-based face authentication (FaceAuth) amshi tenzüko," ta Honibarnü Butail-i metetdaksü.

India nung Himachal Pradesh state nung mezüng digital technology tajungtiba amshiba ajanga public service delivery ajungkettsütsü atema sorkari inyakba shisanger, ta pai ashi.

Tang iba inyakyim tasenba ajanga maparen tezübaba akümstsü aser maitsü jangjaba nung mapang kangabo meindoktsü, ta kasa sangdong ajanga metetdaksü.



July 05, 2025 nü Jammu & Kashmir kübok Anantnag district nung temeshi aini aoertem Amarnath-i atudang tangokba noksa nung angur.



TIR YIMYIM YIMOBILEM (EDITORIAL)

DIMAPUR

AMUNGNÜ

CHITENI 06, 2025

Shibai tama meim ?

Olong ajak rongnung tajungtiba aser tanangtibaji 'tameim' ta asüba ya lir. Nisung ka temulungjang nung temeim melira pa mesüra laji 'kecha masü' ta Laishibai ashir. Atangji, temeim maliba nisungji kecha masü, pa mesüra laji shiruru danga tamajungba. Temeim agidang alima tenzükteter aser temeim agi dang nübortem yariteter. Kibong ka takok ngua otetba aser lokti ka tipdema otetba takok ajakji temeim ajanga lir. Temeim nem asen tashimait mekokdaksüra kibonga talangka moutettsü, anungji balatsü. Tsüraburtem dak temeim maliba agi chirnurtem aika alar jenjang nung timatemer aser chirnurtem dak temeim maliba agi tsüraburtem aika timtem toudhi mapang nunga tawadakdak maka timtemdaksür. Temeim maliba agi yimten aser lokti nung mangatetep timtem adokpet adoker, kechiyong maremzükteper. Temeim maliba agi kiyongkinar dena putepa meliteter. Temeim maliba agi nisung ka dena putepa memedemteter. Nisung ka takar asütsüa akok saka pa dak temeim melira pa akaba ajak amajok, kechiyong pa mesüra la sür külen pa akaba ajak tangar keti aotsü. Atangji nisung aikati akabayong nüngsang atema teyari agüja alitsüa akok saka ano aikati akaba kija agi masü saka temeim agi agütsür. Sensaker yariba aser nüngdakba purtem anepaluba mapatem ajakji temeim mapatem lir. Ajisüaka, Laishibaibo ashir, "ni sensaker mesütsü kü rongsen ajak agüjaka aser kü mang rongseta asütsüsa bendanga agüjaka, kü dak temeim melira, ni tajangzük maka," 1 Korint 13: 3. Atangji, iba lai tekong angatettsü tasak. Kechiba sensaker mesütsü pei rongsen ajak tenla agütsüba mapaji temeim masütsü ? Kechiba pei mang rongdaksütsü tashi temang tenla agütsübaji temeim mapa masütsü ? Ajisüaka, Laishibaiba ashir, Tsüngremibo nisung mulungjang nung bilemba dang agir. Tetezü, ni sensaker aser timtemer nem kü rongsen agütsübaji temeim agi masü saka nisung tsüngdang nüngsang ka angutsü asoshia agütsür alitsü akok. Aji oda, ni kü taküm bendanga agütsütsü tashi inyakbajia temeim agi masü saka ni atema konang naroküm bushiba mapa ka atema asütsüa akok. Atangji, itemji mapabo tajung saka temeim mapabo masü. Tetezü temeim yabo tajung ta asüba danga tajungba aser temaba. Langka meyipa angutsü imlaa mapa tajung ka inyakbaji junger saka temeimbo iba dang nung jagi tuluba aser jenjanga tasakba, kechiyong temeimi temelen memeshir aser meimlar. Temeimji temeim, ibai yangyuba mapa ka masü. Aji oda, asenok aikati pei akok temeim mapa inyaker. Iba ama temeim mapa agi ana aser talang nung alir nüngdakba purtem aika teyari anguba angashir. Temeim aliba agi tulur takartem aikati tilar aser sensakertem nem pei kiojen lapoktsür aser yarir . Temeim agi, meshimetsürtem teka tazüng meyoker aser temeimi peisasa timtemertem reprangteta yarir. Ajisüaka, Laishibaiba ashir, asenoki temeim mapa meinyakdang Tsüngremi asenok tama meim. Ibai temeimtepertem rongnung temeim seret odangba mapa ka lir. Asenoki aiben tangari asen dang meim nung dang asenokia meimer. Tangari yari nung dang asenokia jet ta langka ka agi yarir. Atangji ajia nüngdak, saka temeim mapa nung shibai tama meim ta asüba ya kanga tongtibang asütsü. Asenoki mejungi liaka Tsüngremi asenok dang tama meim süra, asenokia Pa dang meimba temaitsü tangar dang meimra, iba jagi Tsüngrem mulung pelatsü. Tangar dang meimtsüba ya Yisui latettsüba ozüng tasen ka lir. Anungji shibai tangar memeimer, pa mesüra labo ozüng raksar asütsü. Asenoki kati ka den meimtepdi aser asenoki tama tangar dang temeim mapa inyaksü merangdi. Nüngsang atema masü Tsüngremi asenok tama meimba ama asenoki tama tangar dang temeim mapa inyakdi.

OLEMSABANG

Alu aser shishidak revival ajanga temelenshi

Wati Longchar (Ehkranipathar)

(Maneni yashi adok nungi...)

Tanü lokti jenjang reprangdangra yimtsüng nung alir jentoka lir. Parnok renlokdahtsüba mission inyaksü tongtibang ta ajiteter. Tetezü yimtsüng structure yanglushiba den aluyimba (farming mission, scientific farming) nüngdak. Naga nung tangar dak chiyungtsü asoshi metaloker ali nungbo majungtsü. Tanü asenok aosu Assam nung yua aliba nungi nüchiso nüngdak. Jang, alo, mersü, dal, süngjanglijang, süngolio, shi, entsü aser ango asen sasa peria madoktet tashi lokti maintsü. Yamaji züsentettsü Tsüngremi ali temo talubosa moaja lir. Nüburtem mapa ngua, rongsenren renloka aküm nung dang lokti tajungba küma yanglushitsü aser Government-i ibala asoshi yariteptsü lenmang aika lir. Sensaker lima nung lokti temenen ajak pokteter ta metetdi.

Lokti Yanglushitsü Mera

Shishilemba dak revival adokdakjang ta asüba nungji, mezüngbuba meraji Nagaland ya "land of opportunity" kümdaktsütsüla. Tanü Naga lanur asoshi Nagaland ya "Land of NO opportunity" (tzümar nem dang opportunity agütsünüba lima) ta ashitsü akok. America aser China takatiba lima ta züngshir. Item lima nungji tantsur-tambur, temang-mokokmeiner kar dak alaka lanur mapa maka mangutsü. America aser China lima nung bendangera, tazünger aser mazünger pei yari mapa jenti lir, aser mapang mashika nung mapa anguteter. "America is a land of opportunity", "China is a land of production" ta züngshir. Production orientated, market oriented mapangren balala Government-i anir, arogoi anir, takar aser tazünger ajaki inyak nungbo Naga lima ya-a 'land of opportunity' kümtettsü. Lanurtemi inyaksü (work force) agütsütettsü, saka parnok aikadi anir opportunity create sütsütsü asoshi experience, temulungtetba aser rongsen mali takok aiben mangur.

Nagaland state ngur küm 60 tema, saka menüngdakba Government mapa balala create asüba dak alaka, lanur atema employment "opportunity" meyanglutsür. Government tashi maitba agi "Government over-employed" tashitak agi tonga lir. Nagaland nung rongsen renloka kümdaktsütsü industry kwi lir? Lanur tazünger aika mapa ngutettsüsa, asen lima koba dang "golden triangle" - China, India, Myanmar, Bangladesh ajak shishilemba ajurutepdak lima nung Govt-i kechi inyakteta ali. Koba Govt. aser shiba CM alidang lanurtem atema "Land of opportunity" südaktsütsü ta nükjidong yur inyaka arua lir? Hornbill festival? Failed. Tanü Government-i short-term scheme-orientated mapa ajanga election nung meyongnem shishilembatepba aser ghonda ishika amshia yimsü sütepba yayim yagi lokti nung teraksa dang tali bener arutsütsü. Tang aliba inyakyim short-term scheme-oriented government yagi nüburtem sorkar dak metaloker ochimashi mapa balala inyaka alitsüba lokti ka dang yanglutettsü. Nüburtem jenjang tajungba nung ajungketnura long-term production-scheme nükla nung mapa tenzütsüla. Tanü Nagaland ya "failed state" ta shitettsüsa corruption agi sünga lir. Kasa jenjang nung arogoa lir. Rongsen renlokdahtsüba maparen (production initiative) tenzü k nung dang alima renloktsü aser nübur tejakleni aotsü. Iba nungi arogo shilem kar ta metetdi.

Tatem nung ano nenshia ashir: Tangari inyakteter Aori/Naga nungeri meinyaktettsü na? Inyaktettsü. Ashiko asenok dak tajungba inyaktettsü sempet aser tashi lir. Tsüngremi ali temo, tsüngküm, mopung tajung moaja lir. Anungji, nükla tulu aser tajung yur Aori/Naga nung tenemtsünglen alua prokshia lira aser pei akokba aluyimba mapa tasen inyaktetra, Naga nung dang masü India aser asen meketa aliba country-tem nübur ajunga jenjang tajungbai ajungkettsü. Tarutsü lanur asoshi mapa aika generate sütettsü aser Kanan lima ama akümtsü. Pei sasa züsenteta achiba aser inyakba nung temulung agüja inyakra Naga lima ya takar akümtsü aser lokti tejakleni aotsü. Alu aser shishidak revival adoktsüba mission mapa inyaksü ayongzüker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

St. Thomas nem akhüm agüja Indian Christian day among



July 03, 2025 nü YMCA Ground, Secunderabad nung Indian Christian Day amongdang tangokba noksa nung angur.

July 05, 2025: Yisu Khrista nütsüng rongnung ka, Toma AD 52 nung India-i aruba aser Khrista osangtajung prokba aser Khrista atema asüba bilemteta July 3 nü Telangana aser India tesem balala nungi Khristantemi Indian Christian Day mongogo.

Khristantemi iba benjungmong dang 'Yeshu Bhakti Divas' ta ajar.

2021 küm India nung Khristantemi mezüng iba anogomong monga liasü. Denominations balala-Catholic, Protestant, Orthodox, Evangelical aser independent Arogotemi iba anogomong nung longjemer sarasadema liasü.

Toma-i India tonga Khristan yimsü bener aruba sülen tesüiba küm noklang aika tsüngda Khristan yimsü ajanga India nung sobaliba aser loktiliba nung kongshiba bilemteta iba anogomong amonger.

Hyderabad nung Khristantemi sentong balala ayongzüka among.

Sultan Bazar nung aliba St Thomas Arogo Tenla kidang osangtajung kentem aten aser Toma bilemteta jembi.

Iba sentong nung Rev. Rex Angelo-i Laishiba nung ajemdaker sayutsüngia liasü.

YMCA Secunderabad nunga St John's Seminary nung azüngertem aser shisaliok den medical institutions balala nungi nun tem aika adenshia iba anogomong among.

Telangana Christian Minorities Commission nung chairman Deepak John-i India nung Khristantemi shilem tajung agiba osang balala lemsatepa liasü.

John-i, "India nung aliba shisaliok rejutem nung tenzüker shilem 25 bo Khristantem lir aser nursing sector nung shilem 35 bo Khristantem lir," ta metetdaksü.

Paisa, "Linük yangerba nung asenoki (Khristantem) kanga tongtimbang shilem agiogo. Science aser technology, yimtsüngtem aser tribal areas nung nüburtem tenzükbba nung asenoki tongti shilem agir. Iba linük tashi itdaksütsü atema asenoki

maneni kasa tanela nung inyakdi," ta ayongzü.

Telangana Federation of Churches convenor, Raju Alex-i Khristantem dang, "Missionary temi inyakba mapa tajung mamadoktsüla. Parnoki mapa tajung inyakba atema asenoki nüma atangtsüla aser par tsüngsü nung anidaksüla," ta ashi.

TPCC secretary Ezekiel-i, "Khristantemi linük nung kanga tongtimbang lenla aika nung tenzükogo, talisa shisaliok aser healthcare nung junga tenzükogo. Asenoki temeim aser yimjung osang proker. Asenok longjema alitsü mapang tongogo," ta ashi.

United Christian Church Council general secretary, Sleeve Galleli-i, "Yisu Khrista nütsüngtem rongnung India-i mezüng arusangji pa (Toma) lir. 52 AD nung pa Kerala tonga aru aser Mylapore nung taküm bendanga agütsü. Pa taküm bendanga agütsüba tesem nungji tang Santhome Tenla ki lir," ta metetdaksü.

Indian Christian Day anogomong nung India nung

Toma-i inyakba mapatem bilemtetba dang masü saka tamangertem dang Yisu Khristai sayuba ama taküm alitsü, linük tenzüksü aser yimjung atema inyaktsü ajungshir.

Brihostibarnü Punjab kübok Pholariwal nunga Youth Punjab Christian Movement-i Indian Christian Day among. Iba sentongji State Youth General Secretary, Rohit Masih Avraham leniba nung agi aser lanurtem aikati shilem agia liasü.

Iba sentong nung o jembirtemi Toma-i India nung missionary mapa inyakba aser Khristan temeim osang prokba indang lemsatepa liasü.

Rohit Masih Avraham-i, Indian Christian Day ya puti otsü bilemteta benjungba sentong ka dang masü saka Khristantem dang temeim aser aria bilemba shisatsü alitsü aser loktiliba tenzüksü atema nenshia metetdaksüba anogo ka lir, ta ashi.

Paisa lanurtem dang tanü putu nung telongjem, yimjung aser ochi temeden proker kaka asütsü ayongzüka liasü.

Tzüyim nung puoktsüba Khristan refugee tem kong aliar memetet

July 05, 2025: Ita ana tejaklen India nung ketdangsertemi Rohingya Khristan refugee tem tzüyim nung puokja liasü, iba sülen parnok aika tang tashi kong aliar mejangja.

India navy temi Khristan refugee tem nem life jacket semdaksüba sülen tayimtsü nungi tzüyim nung tsükdakja liasü, parnok karbo tzüküm tashi tzü waa oa par lima Myanmar (Burma) tongogo.

Delhi nung osangbener den jembidang Sadeq Shalom-i, "Parnok taküm ali asü süadokerar kari danga ashi nungbo kanga ajungtsü. Onok kanga ratamatar," ta metetdaksü.

Taküm May 6 nü India ketdangsertemi Khristan 15 densema Rohingya nung 38 tayimtsü nungi tzüyim nung puokja liasü.

Police-i Rohingya Khristan refugee temji Delhi kübok Uttam Nagar aser Vikaspuri kiyong na nung apu aser Rohingya Muslim nung 23 Delhi tesem balala nungi apu.

Rohingya Khristantem aser Muslim nungertemji Myanmar tzüküm tashi tzü waa odaksütsü atema tzüyim nung puokja liasü.

Nasir David-i, "Ketdangsertemi parnok kibongtem nem osang jelia kecha memetetdaksü," ta ashi.

Sadeq Shalom-i, India nungi meindokba Khristan 15 ji parnok kibongtembo India nung lir. May 6 nü Police-i Shalom tedi, John Anwar-a pua liasü. John Anwar den tetsür pongu aser kanga tambur asem densema tebur 10 May 9 anepdang tayimtsü nung anir aoba sülen tzüyim nung puokja liasü.

Khristan 15 rongnung Anwar kinüngtsü-a densema liasü.

Shalom-i, "Kütsü diabetes agi shiranger aser kübok blood pressure treatment tagidak liasü. Myanmar nung ozü tsüraburtem ket nung sen makai parnok koma lidarar ni shisabulua bilemtsür," ta ashi.

Paisa, David'er tsürabur densema aikati tzü awa mashi,

ANOGO ABEN TSÜNGREM DEN

O nung masü ain nung

Kechiyong Tsüngrem yimli O nung masü ain nung lir. 1 Korint 4:20.

Mezüng arogotem nung Pauli pa mapa nung tashishitepba aika ajurua liasü. Pa anemer kar Korint yimli ama sema ao aser Pauli shidak meinyaker ta jembi. Mapang ajak nung Paul anema jembiba nung amangtsü tamangertem mesüzük.

Tsüngrem senso chichiba tetendangbaji temesüzükba O masü saka pa taküm nung tanelaren ainji lir ta Pauli bilemtetdaksü. Pauli tsüngrosonga mejembir ta kari jembiba Pauli meteta liasü (2 Korint 10:10). Aji saka parnoki pa taküm nung Tsüngremer ain indang parnoki masüngdang. Nisung aika temulung meyipba aser pa mapa nung arogo aika tenteta aoba pai ngua liasü. Tsüngremi pa amshia aika aneptsü aser tasü nungia shia arudaksü. Tsüngrosong O mesükshii Tsüngrem aruba Pa O tem nung tanela ain aser tashi küta liasü.

Tsüngrem indang parnok tebilemba agi na mesüzüktsü nai aika ajurutsü. Parnoki jangratemtsüka jembitsü. Parnoki noksa yanglua parnok onüktem agütsütsü saka parnok O tagitsü asü masü tetendangbaji parnok taküm nung tanelaren ainji lir. Nisung kati Khristan tesayuba raa jembir saka pa dak temenen inyakba yimya pa O tem pai mezüngmeshir. Nisung kati Tsüngrem ain indang jembir, saka pa taküm nung takok anguba indang kuli mekara pa/la O tem tazüngla lir. Khristan taküm ka indang jembitsü temelaba saka alitsü tasakba lir.

Nai temeshiba mesüka sayur saka iba tashiji magizüki lir (2 Timoti 3:5). Tsüngrem dang ne temenen nungi merüktettsütsü aser ain sayutettsüsa pa tanela tashi indang asüngdangang.

anungji tzüyim nung parnok süadoker asü taküm aliar onoki memetet, ta ashi.

Taküm February 26 nü ketdangsertemi biometrics atema Rohingya Khristan 150 jaoka liasü aser tesülen ketdangsertemi parnok ajak chiok. Ajisüaka May 6 nü police-i ano nisung 15 tanaben jaok.

Internet connectivity majungba agi parnok biometrics magitet. Parnok ajak Inderlok Detention Centre-i anir aoba sülen parnok ket nungi phone meshizüka ayu.

"Parnok ket nungi phone meshizüka ayuba ajanga parnok den tongtepratep mesütet. Tang parnok kong aliar onoki memetet," ta Shalom-i metetdaksü.

Tasügnü mejangjaba nisung kati phone ajanga Shalom dang tedi Anwar densema Khristan aika airport-i anir ogo aser parnok linük nungi meindoktsü ta metetdakja liasü.

Anogo asemnü lir May 9 nü Anwar-i angopur ka meyong

phone ajanga Shalom dang pabo tzü waa Myanmar tzüküm tongogo, ta metetdakja liasü.

Shalom-i, "Onoki Arogotem, Khristan organizations aser nüburtem dang onok atema sarasademjang aser akokba lenmang balala agi yaritepang ta mepishir. Iba dak alia onok jenokdaksütsü atema sorkar den jembitsütsü mepishir," ta metetdaksü.

Tang India sorkar ket nung Rohingya Khristan 135 lir. June 19 nü Amnesty International-i India sorkar dang linük nungi Khristan refugee tem meindokba anenang, ta mepishiogo.

Myanmar nung sepaitemi reshikangshiba marem 2014 küm Shalom den Rohingya Khristan 150 shi India-i jena arua liasü.

Parnok Delhi tonga aruba sülen India sorkari parnok aika nem Long Term Visas (LTV) agütsü aser parnokisa United Nation High Commissioner for Refugees (UNHCR) nunga register süa liasü.

AO OSHI ANGAZÜKDAK:
TANÜ ANGAZÜKTSÜBA OJANG



Tir Yimyim

Tepset

- (v) südaksü (kill)
- * Kiralongrartemi nisung tepset.

Teptep

- (v) nisungtem teka itepa raratepba (physical fight amongst people)
- * Election mapang telok ana tsüngda teptep.

OLONG PAITEP # 7201


1		2				3			4
					5		6		
		7							
8									9
			10						
11							12		
	14		15	16					
17									
						18			

TIPIEN	LANGTSÜNGLEN
1. Ki temalen - (5)	2. Tanemi - (4)
5. Aonsotsü tasa ka - (6)	3. Nisung ishika - (3)
7. Tenarong maten - (6)	4. Talang masü - (3)
11. Jabaso masü - (4)	5. Tesülen-i ao - (9)
12. Te _ _ _ _ ng - (4)	6. Süng-i yangluba auso - (6)
15. Asüngdangba ashi - (6)	8. Angatet - (5)
17. Salang / Kimalen - (6)	9. Amangbapur tentet - (5)
satem atemba - (6)	10. Tenük agi manguba taküm - (6)
18. Mi nung atsük - (5)	13. Süng lanu - (4)
	14. Ali nung alang - (3)
	16. L _ _ _ r - (3)

OLONG PAITEP # 7200 TELANGZÜBA

TIPIEN :	LANGTSÜNGLEN :
1. Kilem, 5. Lasüng, 7. Samaru,	2. Lasa, 3. Kar, 4. Ana, 5. Langtsüng,
11. Jala, 12. Naro, 15. Langzü,	6. Sujung, 8. Rajem, 9. Arogo,
17. Sabang, 18. Arong.	10. Tanela, 13. Züno, 14. Lao, 16. Anu.

NAI-A YA METETTER MA



India nung osang kaket tejentiba 10:

1. Bombay Samachar / Mumbai Samachar: 1822 küm ngutet; tang tashi adokdar.
2. Hicky's Bengal Gazette: India nung mezüngbuba osang kaket 1780 küm adok saka 1782 küm anenogo.
3. The India Gazette: 1780 küm tenzük
4. The Calcutta Gazette: 1784 küm tenzük.
5. The Madras Courier: South India nung mezüngbuba osang kaket; 1785 küm tenzük.
6. The Bombay Herald: 1789 küm tenzük.
7. The Times of India: 1838 küm tenzük.
8. The Hindu: 1878 küm tenzük.
9. The Tribune: 1881küm tenzük.
10. Malayala Manorama: 1888 küm tenzük; Malayalam osang kakettem rongnung tejentiba ka.

Manipur: 18buba Disturbance Free Education Zone Demand Day among



Imphal, Chiteni/July 5 (Agencies):

18buba Disturbance Free Education Zone Demand Day amongba anogo Manipur kübok Imphal valley nung nisung noklang aikati rally nung shilem agiogo. Rally nung shilem agirtem ya timba tesayur aser kaketshirtem liasü.

Iba sentong ya Democratic Students' Alliance of Manipur (DESAM) densema lokti tentet 16-i ayongzüka, "Make Education a Disturbance Free Zone" omen nung ajemdaker agiogo.

Imphal East aser Imphal West district nung rally ya Manipur Legislative

Assembly anasa THAU Ground nungi tenzük aser airport anasa Imphal College nung tembanga liasü.

Kakching aser Thoubal districts nung nüburtem BASU Ground nung adenshi aser iba sülen Thoubal College leni oa liasü. Bishnupur district nunga iba rally ya DSA Ground nung tenzük aser ECHO Thiyam Leikai community hall nung tembanga liasü.

DESAM tir Mayengbam Somorjit-i commite takhangba tem metetdaksü, aser sorkar dang educational institutes ajak atema küm nung anogo 220 bosa class agidaksütsü

atema ozüng ka yanglutsü mepeshia liasü.

Paisa, temsüa aliba tesayurtem rongnungi Directors of Education (School) aser Education (University and Higher Secondary) shimtsü ayongzüük.

Maneni committee-i, education dak sendakba nung inyakyim ajak ochi mashi inyakyim aser tejak repranga inyakba nungi pila toktsütsü takhangba agütsü.

Tatemsa parnoki telungpur telok ajak dang educational institution tem dang nungi magütsütettsüsa takhangba magütsütsü mepeshia metetdaksüogo.

Namsai kübok school tem nung Tai Khamti oshi sayutsü

Itanagar, Chiteni/July 4 (Agencies):

Arunachal Pradesh kübok Namsai district nung August 16 nü nungi tenzüka sorkar aser nija school aser Buddha Viharas ajak nung Tai Khamti oshi ya tasembuba oshi ama sayutsü.

Iba osang ya Deputy Chief Minister Chowna Mein-i, Mini Secretariat kübok Deputy Commissioner indang Conference Hall nung lepa reprangshiba senden ka amenba mapang ashi.

Mein-i ashiba agi, Tai Khamti nunger oshi aser sobaliba maitsü wazüka ayutsü aser ajungkettsü atema iba telemteba ya agiogo. Pai, Deputy Commissioner dang district kübok nija school ajak nung iba policy ya benoka inyakdaksütsü atema jenjang tapet agitsü tetuyba agütsüogo.

Tai Khamti Heritage & Literary Society (TKHLS) nem primary-level kaketshirtem

atema primers print asütsü aser iba oshi dak sendakba nung tesayurtem nem training agütsütsü nongloksüogo.

Senden nungsa July 8 nü "Nadi Utsav" amungtsüba indang sensaksema liasü. Iba sentong nung shilem ka ama ayong aser ayonu tem nung ango chanu chioktsü atema telemteba agiogo, koba ajanga ayong nung ango tali rendaksütsü aser arem shiruru aser tsümopung liromedema toktsütsü.

Kasa mapang nung "Ek Ped Maa Ke Naam" campaign kübok süngtong atemba sentong sorkar institution tem, yimtsüng aser lenmang tezülen atemtsü asoshi telemteba agiogo. Süngtonglidong aser tsümopung wazüka ayutsü atema tangazükba agütsütsü nükjidong nung iba jenjang ya agitsü lir.

Maneni merekmeju inyakyim tajungba

kümdaksütsü atema "Cleanliest Village" inyakyim kübok constituency shia nung yimtsüng kaka model village ama shimtsü. Iba setong ya waste management aser lokti merekmeju dak rangloker inyaksü.

Ketdangsürtemisa iba tesem nung temesepba mozü achirtem timba küma tebilemtsü taliba küma aoba azüoktsü atema sensaksema liasü.

Senden nungsa Borbeel awatsüng asüngsashiba indang lepa reprangshiogo. Senden nung Namsai MLA Chau Zingnu Namchoom, Deputy Commissioner C R Khampa, ZPC Urmila Mancheykun, ZPM Chongkham, Chongkham aser Wakro ADC, department tekolaktem, loti lenirtem, Head Bhantes of Namsai, Kherem asre Golden Pagoda, aser TKDS, TKSC, TKHLS, aser ATKSSU züngsemtemi shilem agia liasü.

Manipur nung PREPAK züngsem ka tanaben pushiogo

Imphal, Chiteni/July 5 (Agencies):

2012 küm taoba Manipur Legislative Assembly Speaker'er kima bomb pokloksüba atema telungpur ka shiba rakzükrakdemba atema police ket nung yua liasü, pa court kima tanaben pushiogo.

People's Revolutionary Party of Kangleipak (PREPAK) indang self-styled captain Nameirakpam Dhamen Singh ya rakzükrakdemba ken o nung aija Chief Judicial Magistrate (CJM), Imphal West matsüng dang nokdakdaksüba sülen mezüng police-i Hokolbarnü

apu.

Singh ya Imphal East district nung Irilbung Police Station kübok Bashikhong Khudekpi Mamang Leikai tesem nung alir, aser pa June 18 nü Bishnupur district kübok Kwakta Terakhongshangbi Bazar nung pua liasü.

Police-i pa ket nungi porangbong injang aser tashishitsü aketba kuli kaket aika ngutetogo. Pa ya nüburtem, local shishilembartem aser sorkar office tem nungi rakzükrakdemba atema aija liasü.

Rakzükrakdemba ken o nung pa okadak nokdakba

sülen Singjamei police-i kasa okadak dang January 22, 2012 küm bomb pokloksüba ken o nung densema aliba atema aputsü temelaba meshia liasü.

Iba tatalokba ya Chingamakha Kshetri Leikai, Imphal West nung taoba Speaker Irengbam Hemochandra'er kima nikongtsütsü 6:30 ako meta bomb tesashi ka apokba dak sendaka lir.

Iba lendong nung nisung ka asü aser nisung pongu yirua liasü. Police-i Singjamei police station nung ken o ka benokogo aser küm ter dak tema bushisüngdanga arudar.

Iran-i par nuclear sentong reprangdaksütsü memela: Trump

Washington, Chiteni/July 05 (Agencies): Iran-i par nuclear sentong inspections asütsü memulung mesüra uranium enrichment mapa metoktsü, ta United States Tir Donald Trump-i ashi.

Hokulbarnü Air Force One tayimtsü nung mener osangbener den jembidang, Tehran indang nuclear sentong teti atema raksatsüogo ta ashi saka Iran-i ano danga tesem nung tenzükshitsü akok ta ashi.

Hombarnü Israel Ato Kilonser Benjamin Netanyahu-i White House semdangba mapang Iran indang jembitsü ta Trump-i ashi, kong Gaza ceasefire atema jembitsü imlar.

White House nung Independence Day amungba sülen New Jersey-i aoba mapang, "Parnoki ano tesem dang aka nung tenzüksü ama ni bilemer. Aser parnoki tenzükra, ibaji tebilemtsü asütsü," ta Trump-i ashi.

Pai Tehran nem par nuclear sentong metenzükshidaksütsü ta Trump-i ashi aser Iran ketdangsür temi pa den ajurutepner ta shia liasü.

Iran nung US aser Israel nati bomb pokloktsür aliba nuclear facilities semdangtsü memelaba yong par inspectors tem Iran nungi anizüker ogo, ta International Atomic Energy Agency (IAEA) ajanga Hokulbarnü shia liasü.

Iran-i nuclear weapons yanglutsü atema uranium

enrichment mapa inyaker, ta US aser Israel-i ashir. Ajisüaka Tehran-ibo nuclear bomb yanglutsü tebilemba mali saka ibai civilian amshitsü atema lir ta küm aika nungi shijen shia arur. Aser Tehran-i nuclear nok-nü yangluba kuli kata US itdangiter mesürqa UN nuclear watchdog chief Rafael Grossi nungeri nguteta mali.

Anogo 12 raraba mapang Israel-i mezüng Iran indang nuclear sites nung amak, aser iba sülen US teka aita June 22 nü tesem balala nung amak.

Grossi-i Iran indang nuclear facilities semdangtsü ya pa indang teinyaktsü tongtipangtiba ta shiaka IAEA indang inspector temi Iran indang facilities kata mesemdangtet.

IAEA ajanga 'monitoring and verification' akok tashi tekeraba nung tenzükshitsü atema Iran den jembishinü akatsü kanga tongtipang lir, ta Grossi-i ashi.

US aser Israel nati amakba sülen Iran, shiri tang tashi Treaty on the Non-Proliferation of Nuclear Weapons (NPT) nung aliba ama inyaker ta shia liasü, parnoki IAEA dak tamang makai akumer ta indang-indanga shia liasü.

Rara tenzükba sülen Iran ketdangsür temi IAEA kanga sashia aija liasü, kechiaser parnoki Israel aser US ajanga amakba maitsüetba kisüng masü saka Tehran-i nuclear obligations nung manidaker ta tai tonglokja June 12 nü parnoki

pangzüng ka yanglua liasü, aser iba sülen Israel-i amak.

Bodhbarnü Iran Tir Masoud Pezeshkian-i par linük dang IAEA den tesendaktep rakdangtsü totuyuba agütsü. Iba nuclear watchdog den amalitep makai amuktsü atema bill ka Iranian parliament nung agizüker linük indang Guardian Council-ia melaogo.

Nuclear facilities aser scientists nem security guarantee agütsüba densema parnoki akhangba kar meinyak dangi iba tesendaktep rakdanga atatsü, ta bill nung shia lir.

Iran-i tesendaktep rakdangba osang onok nem tang tashibo agüja mali, saka agency indang inspector tem Iran-i tanaben aotsü mejangja, ta IAEA ajanga ashir.

Israel aser US nati bomb pokloktsür aliba nuclear facilities semdangtsü Grossi-i mepishiba Iran Foreign Minister Abbas Araghchi-i Hombarnü memela.

Mitkari bomb pokloktsüba mapang Iran indang uranium enrichment sites asem samatsüogo mesüra kanga mejungi raksatsüogo ta US-i ashir.

Ajisüaka Iran indang enriched uranium tonne toku, talisa uranium tuozük seret 400 dak tema purity shilem 60 shi aliba kechi asüar mejangja. Nuclear nok-nü yanglutsü asoshi uranium purity ya shilem 90 mesüra tema asütsüla.

US ceasefire sentong nung telangzüba tajung agütsüogo: Hamas

Cairo, Chiteni/July 05 (Agencies): Gaza nung ceasefire alitsü aser pua alirtem chiochtsü atema US-i tang tesüsa proposal agütsüba nung telangzüba tajung agütsüogo, ta Hamas-i ashir.

Palestine nunger telungpur telok yagi yimjung asoshi tekeratiba nung jembishinü tenzüknerm ta Hokulbar aonung ashi saka parnoki iba terms ya agizüktsü asü masüar ajibo mashi.

Hamas-i temelenshi kar atema asüngdangogo aser yangji US-i yaria teyari agütsüba anentsü aser rara tembangtsü asoshi jembishinüba nung tamakok ajurura rara metenzüktsü ta US-i kuli sütettsü densema lir, ta Palestine nunger ketdangsür kati ashi. Israel sorkari telangzüba agüja mali. US Tir Donald Trump-ia iba indang ano mejembi ta ashi saka Hamas-i telangzüba tajung agütsüba ya junger ta ashi.

"Taruba hopta Gaza deal ka alitsü akok," ta pai Air Force One tayimtsü nungi osangbener dang ashi.

Taruba hopta Israel Ato

Kilonser Benjamin Netanyahu-i White House semdangba mapang Trump-i osang tajung kanga sangdongner ta ashir.

Israel-i anogo 60 ceasefire atema "necessary conditions" agizükogo aser iba mapang telok ajaki rara tembangtsü asoshi inyaktsü, ta Trump-i Mongulbarnü shia liasü.

Iba sentong nungya Hamas-i pua bener aoba Israel nunger takum alir nisung ter aser tasü mang 18 chiochtsü aser iba melen Israel nunger tepuokdak yua aliba Palestine nungertem chiochtsü densema lir ta amanger.

Gaza nung tang tashi hostages 50 lir, aser parnok rongnung nisung 20 shi takum lir ta amanger.

US-i proposal agütsüba nungya UN aser International Committee of the Red Cross densema tekeratiba nung Gaza telungi teyari peria aitdaksütsü indanga shia lir ta ashir.

Hamas-i teyari oset ya UN aser par partners temi kisüng alemtsüla aser Israel o US teyari nung Gaza Humanitarian Foundation (GHF) ajanga lapoka aliba mangatettep

aketba aid distribution system ya tangsa tembangtsü akhanger, ta Palestine ketdangsür temi ashi.

Ano Hamas-i akhangba kaji Israel sepaitem ainshitsüba ya lir, ta Palestine ketdangsür temi ashir.

US-i benokba proposal nungya Gaza tesem balala nungi phase lemsar Israel sepaitem anizüker aotsü dena ali südi ta amanger.

Teti atema yimjung meyangluteti ceasefire tembangnunga Israel-i anünglen aser alilen nungi operations agiba metenzüktsü ta Hamas-i US nem kuli südaksüner.

Pua aliba ajunga mechiokma tashi aser Hamas mitkar aser yimsüsüba tashi mesamatsü tashi rara manentsü ta Israel ato kilonseri shia lir.

Honibarnüa Israel sepaitemi Gaza nung Palestine nunger nisung 56 tepsetogo, ta mozüki ketdangsür temi ashir.

October 2023 nungi Gaza nung rara tenzüker tang tashinung Israel sepaitemi Palestine nunger 57,338 tepsetogo aser 135,957 yirutsüogo aser ano aika ki o jen raksaba agi nembanga lir ta ashir.

Office of the

MONGSENYIMTI VILLAGE COUNCIL

Rionsanger Putu

B.P.O. Mongsenyimti, P.O. Chuchuyimlang- 798614

Dist: Mokokchung, Nagaland

AYIMOKTSÜR

Rionsanger Putu Mongsenyimti ajanga 26th June 2025 anogo Dimapur nung Meyi Jamir aser Rohit Kumar Sah (Dharannath Sah jabaso) tsüngda atalokba keno dak sendakba nung rajem sangdong ka sangdonger.

Dimapur Mongsenyimti Senso Telongjem ajanga met anatsü nungi jaoka keno ajak Zep-zep ta angadanger merataket Aor sobaliba dak aketba ama azühtokshitsür dang AK ka sENCHI chia tzübENDANG O obENDANG agütsüogo, Rionsanger Putu, Mongsenyimti ajanga Dimapur Mongsenyimti Senso Telongjem Salangi tim obENDANG agütsüogo ta kuli agütsür. Iba meraket Aor sobaliba inyakyim sensamasaja sobaliba memeteter kija aser jilushi ayir-temi lokti mopung tangla sabang balala nung tilobangloba ngua ozü Shilang menden kanga aoksar aser sasar aser meima bilemTsür.

Anungji iba Ochiba sobaliba latet dak sentakba nung merajemba lira Rionsanger Putu Mongsenyimti ajanga rajemtsütsü renema lir aser tang nungi kari danga ozü sobaliba inyakyim tiloa tashishitsü aketba O jembiba, züluba aser ayiba putetra ozü Rionsanger Putu ajanga tatem tashi bushitsü ta ajak dang tekümdangtsü sangdonger.



Aosingit
Chairman



Maputemjen
Secretary

Village Council MongsenyimtiMongsenyimti Village Council

Texas ajungben tzümetsüng nisung 24 asü, 23 samar bushir

Texas, Chiteni/July 05 (Agencies): Tzünglu kanga sashia aruba ajanga Texas nung aliba Guadalupe River nung ajungben tzümetsüng adoka nisung 24 asü aser rescue team temi ano nisung aika kumzüktsü merangba mapang lir ta yangji aliba ketdangsür temi ashi.

Samar alirtem ronung nisung 23 nungi 25 tsüngta tetsür kisüng Christian summer camp ka nungi lir, shirnok Guadalupe ayongkum anasa munga liasü, ta ashi.

Texas nung tsürabortemi shisabolua pei jalatem indang noksa social media nung prokshia liasü.

"Tang tashinung nisung 24 shi süogo," ta Kerr County Sheriff Larry Leitha-i Hokulbar nikongdang osangbener senden ka nung ashi aser mapang tatsüka lir nisung 24 süogo ta jangjatsü.

Tzünglu 300m (12 inches) shi aruba sülen US National Weather Service ajanga Kerr County shilem kar nung flash flood emergency sangdonga lir, koba south-central Texas Hill Country nung San Antonio nungi northwest tsütsü kilometre 105 shi pilar lir.

Kerville atema city manager Dalton Rice-i ashiba agi, tzümetsüng tesashi ya anepbongi adok, anungji ketdangsür temi nüburtem dang ayongkum nungi ainshiang ta ashitsü mapang meliasü.

"Ibai kanga kera atalok, mapang tatsüka tsüngta aser radar-ia metakzütet. Ghonda ana majungdang iba ya atalok," ta Rice-i ashi.

Nisung tasü mang trok nungi ter tsüngta nguteta lir, ta Lieutenant Governor Dan Patrick-i shia liasü. Kasa

mapang osangbener den jembidang Sheriff Leitha-ibo tzümetsüng ajanga nisung 13 asü ta ashi.

Anepdang 4:00 ako (par mapang) meta tzümetsüng agi summer camp ka nung tanur 700 dak tema pongzüker aoba nungi tetsür 23 kong aliar mejangjar, ta Patrick-i ashi.

"Iba tetetzü parnok samar ta ashir masü, parnok süngdong nung alitsü akok, parnok den osang magitepteter alitsü akok," ta pai ashi.

Central Kerr County nung am Mang tepiyong tzünglu 250mm shi arua Guadalupe River nung ajungben tzümetsüng ya adoka samar alirtem asoshi osang agitepa liasü.

"Kar tain, kar tanur. Maneni, item tasü mang ya kolen nungi aruar memetet,' ta Patrick-i osangbener senden ka nung ashi.

Texas nung aliba nüburtem dang tanü nikongdang kanga sarasademtsü ayongzüker. Ali nung temokok agi tsükiter sarasademjang," ta Patrick-i ashi.

Tzünglu kanga sashia aruba mapang minute 45 tsüngta Guadalupe River nung tzu feet 26 tali ayim ta pai ashi. Ketdangsür temi helicopter 14 aser drones ter dak tema den ali nung emergency personnel noklang aika yoka lir, ta ashi.

Texas Governor Greg Abbott-i Kerr nung teyari tekeraba teyari agütsütsü mechi disaster declaration ka nung meyon gnem agütsüogo.

Yangji aliba ketdangsürtem yaritsü asoshi US Coast Guard aser Federal Emergency Management Agency nungi nübu yoka lir.

Zumvu-i Nagaland Chess C'ship kokogo



Kohima, Chiteni/July 5 (TYO):

Honibarnü Kevilekho Zumvu-i 21buba Nagaland State Chess Championship kokogo. Iba asayamung ya All India Chess Federation tawabangba kübok Nagaland Chess Association (NCA)-i ayongzüik aser Ockter Services Pvt. Ltd., Dimapur-i teyari agüja NOA Complex Kohima nung asayaogo.

Zumvu nem senpet sen 30,000 den takok marok aser kuli kakat agüja liasü. Tanabuba jenjang nung tembangsa Heilamgumbe Haikube nema senpet sen 20,000 den takok marok aser kuli kakat, tasembuba

Salhuto Nyekha sen senpet sen 10,000 den takok marok aser kuli kakat agüja liasü. Parnok asem den pezübuba nung tembangsang Mughaho Awomi nungeri taruba National Chess Championship nung state tenüng nungi asayatsü. Iba asayamung ya September ita Andhra Pradesh nung asayatsü.

Under 14 category asaya Touch of Hope School Chumoukedima nungi Jitihto Nyekha-i akok aser tanabuba aser tasembuba jenjang nung North Field School Kohima nungi Heilhoukho Semou aser G Rio School Kohima nungi Kevisehu T. Zatsu na liasü.

Under-10 category ya North Field School Kohima nungi Otsi Tunyi-i akok, tanabuba jenjang nung G Rio School nungi Damiah Lyngdoh aser tasembuba jenjang nung N. N. Nagi School Dimapur nungi Jeremy Zhimomi liasü. Category anaprongla nung takok angur nem senpet sen 5000, 3000 aser 2000 den takok marok aser kuli kakat agüja liasü.

Tetsürtem rongnungi Under-10 category nung asayar tajutilaji North Field School Kohima nungi Choli Tunyi liasü aser teburtemrongnungi asayar tajungtibaji North Field School Kohima nungi Maongkar Ozukum nem agütsü.

Tuli nung Indoor Badminton stadium tasen ka semzükogo

Dimapur, Chiteni/July 5 (TYO): Tuli Sub-Division nung saisabong ajungketba nung alizüng tasen ka tongteta July 5 nü Double Court Badminton Indoor Stadium ka semzükogo.

Iba sentong nung Mokochung Deputy Commissioner Ajit Kumar Verma, IAS, alakteta jaoker liasü aser pai iba stadium tasenba ya semzükja liasü.

Double Court Badminton Indoor Stadium ya SDO (Civil) & Border Magistrate, Tuli Nukshimatong, NCS-i achaayanga aser Nagaland kübok tesem balala nungi nüburtemi tenla tajung agüja Tuli Sub-Division Badminton Association (TSDBA)-i yangluogo.

Iba stadium atema senotsü ya mezüngbo TSDBA züngsemtemi lenmang balala ajanga senotsü bushia tenzüka liasü. Association-i tenla agütsür ajak dang kanga pelaba lemsatepogo, shirnoki kanga mulungsoa tenlaba ajanga iba pungmang ya asangsang kümdaktsüogo.

Sentong nung o jembiba mapang Deputy Commissioner-i, iba amala infrastruktur terenlok asoshi lokti-i achaayanga inyakba atema tenüngsang agütsü. Pai ashiba agi, alirongsen balala agi masü saka nüburtemi lokti



ka tejakdangi anir. Paisa, SDO (Civil) & Border Magistrate, Tuli nem pai anibelem mesasai bendanga agüja meranga inyakba atema tenüngsang agütsü, koba ajanga stadium takok ngua yanglutetogo aser iba nükla ya asangsang kümdaktsüogo, ta ashi. Maneni tarutsü nunga lokti-i longjemer shilem agütsü ajungshiba den iba amala inyakyim ajanga sorkar inyakyimtem tali tedangshiba kümdaktsür ta ashi.

Kisüba osang agütsüba mapang project ajunga ya sen lakh 35 shi intoka yanglu aser ajakji lokti-i tenla agütsüba ajanga lir ta metetdaktsü.

Iba stadium tasenba ya badminton asaya renloka aoba tesem ka, sempet aketeritem ajungketba tesem ka aser tarutsü nung inter-district asayamung tem ayongzüka asayaba tesem ka akümtsü imlar.

World Police & Fire Games: Assam sepaitemi medal 8 angu



Chiteni/July 5, 2025 (Agencies): Birmingham, USA nung tang asaya aliba World Police and Fire Games (WPF) 2025 nung Assam Police nungi sepai pezüi gold medal pongu aser silver medal asem densema medal ti nguogo.

Medal ajak ya wrist wrestling category nung nagua liasü.

Kandarapa Borah-i, teka tachichi aser tabelen ta asaya anaprongla nung gold medal angu. Amlanjit Borthakur-i teka tachichilen asaya nung gold aser tabelen asaya nung silver medal ngua liasü.

Junmoni Das-i, teka tachichilen asaya nung gold medal aser tabelen asaya nung silver medal angu. Maneni Lovita Koch-i teka tachichilen asaya nung silver aser tabelen asaya nung gold

medal ngua liasü.

Assam Chief Minister Himanta Biswa Sarma-i social media ajanga medal angurtem nem tenüngsang agütsüogo, aser iba ya state atema nemadangsü mapang ka lir ta ashi.

World Police and Fire Games ya küm ana nung khen asayaba Olympic mesükba asayamung ka lir, kong alima ajunga nungi police officers, firefighters, border protection, customs, aser correctional service personnel temi shilem agir.

Iba ya California Police Athletic Federation (CPAF)-i ayongzüka asayar aser alima nung multi-sport events tulutiba rongnung ka lir.

India team tang overall medal tally nung tasembuba jenjang nung lir. India nunger asayartemi gold medal 174

densema medal 373 ngua lir. Linük ajak rongnung United States (881 medal) temaba jenjang nung lir aser parnok sülen Brazil (469 medal) lir. Taküm küm atema iba asayamung ya Deobarnü tembangtsü.

Kidambi Srikanth Canada Open semifinal-i iogo

Chiteni/July 5, 2025 (Agencies): Indian nunger badminton asayar Kidambi Srikanth-i Calgary (Canada) nung tang asaya aliba Canada Open Super 300 badminton tournament nung maneni kanga junga asaya-a top seed Chinese Taipei nunger asayar Chou Tien Chen straight-game nung koka tebur kija asaya semifinal-i iogo.

Taoba mapang world championships silver medalist, shibai taküm May ita Malaysia Masters final tonga asaya liasü, pai quarter final asaya nung world number six Chen ya 21-18, 21-9 agi minute 43 nung koka liasü.

Srikanth ya tang world rankings nung jenjang 49buba nung lir aser pa semifinal nung Japan nunger third seed asayar Kenta Nishimoto den asayatsü.

Kasa asayamung quarterfinal asaya tanga ka nung 2022 World Junior Championships silver medalist S Sankar Muthusamy Subramanian-i kanga meranga asaya saka 15-21 21-5 17-21 agi Nishimoto mekoki liasü.

tetsür kija asaya nung Shriyanshi Valishetty-i asayamung tepeyong kanga junga asayaogo, saka lai quarter nung Denmark tsür Amalie Schulz majangtet.

Guntur nungi arishi küm 32 tain Srikanth, shibai 2017 küm title pezü koka liasü, pai iba asaya metenzük tsüngda Chen tena terben asayaba trokben makok saka tesüsabuba asaya anabo koker liasü.

Pai asaya kanga junga tenzüik aser pa 5-0 agi tejakdang aküm ajisüaka asaya tur tena point 16-16 ta kasasa aküm. Iba sülen 17-16 ta Chen khen atema tejakdang aküm saka Srikanth-i point pongu atonga ngua mezüngbuba game akok.

Tanabuba game nung tena 4-4 aliba sülen Srikanth-i tajungba asaya-a interval tashi nung pa 11-6 agi tejakdang aküm aser maneni kanga junga asaya-a pa 19-7 agi tejakdang akümba sülen asaya koka liasü. Iba asaya akokba sülen iba asayamung nung India nunger asayartem rongnungi Srikanth kija anunga lir.

BILEMDANGANG

"Timla agi nisung ka anogoshia saker maneni inyaktsü ajungmesor."